

- маганием, всех же православных христиан непознанием, прият царство всеа Руския земли, — вси бо прияли его, не ведая вражия ловления и коварствия, мнеша бо его истиннаго благовернаго царевича Димитрия углицкаго, и царствова 10 месец. Всещедрый ж и премилостивый бог наш не попусти таковаго врага на долго время и не восхоте церкви своєю разрушати и православныя веры искоренити. || И вскоре яви его преступление
- а. 101 всем людям и ангельскаго образа отвержения, и на святыя божия церкви тщетное суетное востание, и гонение на православную непорочную христианскую веру и душу его зле испроверже. Всегда же ратуемыи на нас враги дияволи, искони ненавидя добра роду человеку, возмушая народы друг на друга, прельщая и во безаконие поревая и оттоле наипаче начат прельщати многи человеки. Яко отхожаху в дальныя грады, называхуся тем же именем благовернаго царевича Димитрея и приема с собою, и призывая многих безумных и несмысленных¹ человек, паче же польских и литовских людей. И хожяху по Руской земли и по многим градом, и весем, яко лет шесть, || и святыя божия церкви разоряху, и святым иконам ругахуся, и губяху люди, и проливаху кровь яко воду, и пленя и пожигая, и пусту землю творя, и не жалуют юности и не ждут старости, и всячески и непрестанно стужая нам, и зло творя, и желая конечному погублению предати нас. Ибо тии люторы и ляхи, польские и литовские люди, есть же и руские, иже богоотступники и враги креста Христова, Михайло Салтыков с товарищи, и с ними соединився и преступив крестное целование и мирное стояние и царствующий град Москву до конца пожгоша, всенародное же множество мечю предаша. По всей же Русстей земли хожаста
- а. 102 воюя || и пленя, и пожигая, и мечю предавая, и промчеса их такое необузданое стремление до моря-акяна. Есть же близ моря-акяна град, зовомый Колмогоры, и оттоле возвратистася в Рускую землю лета 7121 году, и пойдоста вверх по Двине реце, рыкая вельми, яко люты зверис, и хваляся зело, на град Устюг. В то же время держа град Устюг от царьскаго синклита боярин и воевода именем Михайло Александрович, зовомый Нагово. Он же, услышав польских и литовских людей сверепое стремление на град Устюг и вскоре созва вся старейшины градския богатыя и убогия, и вся
- а. 102 об. православныя христиане, и возвести им, яко близ || есть польские и литовские люди и како яряся сверепствуют и хвалятся на град Устюг. Всеи ж гражане, слышавше сия, воскричаще вельми со слезами ко всемилостивому богу и пречистей его матери, прося помощи и заступления, и призывая на помощь устюжских чудотворцов Прокопия и Ивана, и устремившася вси единодушно к совету боярина и воеводы Михаила Александровича. И начаша ставити круг града Устюга острог по прежней градской осыпи и круг посаду, донеле же захватиша соборную и апостольскую церковь пречистыя богородицы честнаго и славнаго ея успения, в ней же стояше чудотворная икона пречистыя богородица честнаго и славнаго ея
- а. 103 Оде || гитрея, пред нею же горяше свеча неугасимая день и ночь безпрестани. Тако же и у праведных чудотворцов блаженных Прокопия и Ивана церкви заградиша в острог. И строяху накрепко и пушки и пищали, и вся бранная оружия по забралом и по местом готовляху, и посылаху против польских людей и многия гонцы проводывая, дабы они зли враги наши напрасно внезапно не нашли на град Устюг, и тако пребываху со всяцем опасением. В то же время прилучися во граде Устюзе пребывати божию рабу, некоему пришельцу, мнуху безмолствующу именем Левкее, яко написанием познася
- а. 103 об. имя его. Той ж безмолвник, изоострив язык свой и глас уяснив, || проповеда сему народу нахождения инаплеменик, за избавление града обещатись

¹ Испр; в ркп смынных.